

ЭРҮҮЛ МЭНДИЙН ДААТГАЛЫН ЕРӨНХИЙ ГАЗРЫН ДАРГЫН ТУШААЛ

2026 оны сарын өдөр

Дугаар

Улаанбаатар хот

Журам шинэчлэн батлах тухай

Засгийн газрын Агентлагийн эрх зүйн байдлын тухай хуулийн 8 дугаар зүйлийн 8.4 дэх заалт, Эрүүл мэндийн даатгалын тухай хуулийн 9 дүгээр зүйлийн 9.3, 16 дугаар зүйлийн 16.1.15 дахь заалтыг тус тус үндэслэн ТУШААХ нь:

1. "Эрүүл мэндийн даатгалын сангаас эмийн үнийн хөнгөлөлт үзүүлэх журам"-ыг хавсралтаар баталсугай.

2. Энэхүү тушаалын хавсралтаар баталсан "Эрүүл мэндийн даатгалын сангаас эмийн үнийн хөнгөлөлт үзүүлэх журам"-ын дагуу эмийн үнийн хөнгөлөлтийн үйлчилгээг даатгуулагчдад түргэн шуурхай, чирэгдэлгүй үзүүлэхийг Эрүүл мэндийн даатгалын ерөнхий газартай гэрээтэй эрүүл мэндийн байгууллагын цахим жор бичих эрх бүхий эмч нар, гэрээ бүхий эмийн сангийн захирал (эрхлэгч) нар, эмийн сангийн цахим программ хөгжүүлэгч байгууллагуудад үүрэг болгосугай.

3. Энэхүү журам батлагдсантай холбогдуулан цахим жор бичих эрх бүхий эмч, даатгалын гэрээ бүхий эмийн сангийн эрхлэгч нарыг мэргэжил арга зүйн удирдлагаар ханган, тогтмол хяналт тавьж ажиллахыг Бодлого төлөвлөлтийн газар /Г.Ариунсайхан/, Худалдан авалт, гэрээлэлтийн газар /Н.Наранцогт/, Мэдээллийн технологийн хэлтэс /Х.Бат-Оргил/-т, иргэд, даатгуулагчдыг холбогдох мэдээллээр шуурхай ханган ажиллахыг Олон нийттэй харилцах хэлтэс /Амаржаргал/-т тус тус даалгасугай.

4. Энэхүү тушаал гарсантай холбогдуулан Эрүүл мэндийн даатгалын ерөнхий газрын даргын 2020 оны А/115 дугаар тушаалыг хүчингүй болсонд тооцсугай.

5. Энэ тушаалын хэрэгжилтэд хяналт тавьж ажиллахыг Дотоод аудит, хяналт шинжилгээ үнэлгээний газар (Х.Сувд-Эрдэнэ)-т даалгасугай.

ЭРҮҮЛ МЭНДИЙН ДААТГАЛЫН САНГААС ЖОРООР ОЛГОХ ЭМИЙН ҮНИЙН ХӨНГӨЛӨЛТ ҮЗҮҮЛЭХ ЖУРАМ

Нэг. Нийтлэг үндэслэл

1.1. Энэхүү журмын зорилго нь даатгуулагчид эрүүл мэндийн улмаас учирч болзошгүй санхүүгийн эрсдэлийг бууруулах, эрүүл мэндийн даатгалын сангаас эмийн үнийн хөнгөлөлт үзүүлэх үйлчилгээг түргэн шуурхай, чирэгдэлгүй үзүүлэх, эмийн зохистой хэрэглээг дэмжих, цахим хяналтын нэгдсэн тогтолцоог бүрдүүлэх, оролцогч талуудыг үүрэг оролцоог тодорхойлох, сангийн хөрөнгийг үр ашигтай зарцуулах зэрэг харилцааг зохицуулахад оршино.

1.2. Эрүүл мэндийн даатгалын сангаас эмийн үнийн хөнгөлөлт үзүүлэх (Цаашид “Эмийн үнийн хөнгөлөлт” гэнэ) үйлчилгээ нь Монгол улсын эмийн бүртгэлд бүртгэгдсэн, олон улсын эмнэлзүйн удирдамжид зөвлөсөн, Зайлшгүй шаардлагатай эмийн жагсаалтад багтсан баталгаатай эмийг хөнгөлөлттэй үнээр даатгуулагчдад олгох, худалдаж авахтай холбоотой даатгагч, даатгуулагч, оролцогч талуудын эрх, үүрэг, хариуцлагыг тодорхой болгоход чиглэгдэнэ.

Хоёр . Оролцогч талуудын эрх, үүрэг

2.1. Даатгуулагчийн эрх, үүрэг:

2.1.1. Даатгуулагч нь даатгалын сангаас хөнгөлөлттэй үнээр эм олгох үйлчилгээ авахдаа Эрүүл мэндийн даатгалын тухай хуулийн 9 дүгээр зүйлийн 9.3-т заасан эрүүл мэндийн байгууллагаар үйлчлүүлж, тухайн байгууллагын жор бичих эрхтэй эмчид үзүүлж, түүний бичсэн “эмийн цахим жор”-оор гэрээ бүхий эмийн сангаар үйлчлүүлэх;

2.1.2. Даатгуулагч нь эрүүл мэндийн даатгалын сангаас үнийн хөнгөлөлт үзүүлэх эмийн цахим жор бичүүлэхээс өмнө заавал эмчийн үзлэг хийлгэж онош тавиулах бөгөөд үзлэг хийлгэсний дараа жор бичүүлэх эрх үүснэ;

2.1.3. Хэвтрийн болон хүнд өвчтэй гэртээ байдаг даатгуулагчдад өрх, сум, тосгоны эмч нь гэрийн эргэлт, үзлэг хийх үедээ хурууны хээг баталгаажуулж цахим жорыг бичих бөгөөд эмийн сангаас хөнгөлөлттэй эмийг авахад асран хамгаалагчаар дамжуулж авна;

2.1.4. Даатгуулагч цахим жорын бүртгэлийн хэсэгт өөрийн мэдээллээ үнэн зөв бүртгүүлж өөрийн хурууны хээг уншуулах бөгөөд 18 нас хүрээгүй буюу хурууны хээний

мэдээлэл иргэний бүртгэлийн нэгдсэн санд ороогүй хүүхдийг асран хамгаалагч нь, ажил мэргэжлийн онцлог болон бусад шалтгааны улмаас хурууны хээгүй, уншуулах боломжгүй иргэд хувьд хурууны хээний уншуулах боломжгүй иргэдийн нэгдсэн бүртгэлийн санд бүртгэгдсэн байвал хурууны хээг уншуулахгүй;

2.1.5. Эрүүл мэндийн даатгалын сангаас үнийн хөнгөлөлт үзүүлэх эмийг бичих эрхтэй эмч нь эмчилгээний нийттун, хоногийн нийттунг тухайн өвчний эмнэлзүйн удирдамжид заасан хугацаагаар бичих бөгөөд эмнэлзүйн удирдамжаас давсан тун, тоо ширхэгээр эмийг олгохгүй;

2.1.6. Даатгуулагч нь Эрүүл мэндийн даатгалын үндэсний зөвлөлийн тогтоолоор баталсан “Эрүүл мэндийн даатгалын сангаас үнийн хөнгөлөлт олгох зайлшгүй шаардлагатай эмийн нэр төрөл, үнийн дээд хязгаар, хөнгөлөх хувь хэмжээ”-г

үндэслэн эмийн үнийн хөнгөлөлтийг эрүүл мэндийн даатгалын сангаас төлүүлэх, “Нэмэгдсэн өртгийн албан татварын тухай хууль”-д заасны дагуу төлбөрийн баримтыг эмийн сангаас авах;

2.1.7. Даатгуулагч нь эрүүл мэндийн даатгалын байгууллага, эрх бүхий эмчээс эрүүл мэндийн даатгалын сангаас үнийн хөнгөлөлт үзүүлэх эмийн талаар болон эмийн хэрэглэх арга, үргэлжлэх хугацаа, гаж нөлөө, харилцан үйлчлэлийн талаар мэдээлэл авах;

2.1.8. Даатгуулагч нь эрүүл мэндийн даатгалын шимтгэл төлөлт болон эрүүл мэндийн даатгалын сангаас хөнгөлөлт үзүүлсэн тусламж, үйлчилгээний зардлын талаарх мэдээллийг шалгуулахаар холбогдох мэргэжлийн байгууллага, хуулийн этгээдэд гомдол гаргах, шийдвэрлүүлэх;

2.1.9. Даатгуулагч нь хууль, журам, заавар зөрчсөн, чанарын шаардлага хангаагүй эмээр үйлчилсэн, үнийн дээд хязгаарыг хэтрүүлсэн зэрэг зөрчил гаргасан эмийн сангийн талаар холбогдох хяналт шалгалтын болон эрүүл мэндийн даатгалын байгууллагад хандах, мэдээлэл өгөх, эрх ашгаа хамгаалуулах;

2.1.10. Даатгуулагч нь үндсэн харьяаллаас өөр аймаг, нийслэл, суманд оршин сууж байгаа бол харьяалал харгалзахгүй үйлчлүүлэх бөгөөд зөвхөн нэг цаг хугацаанд ижил төрлийн эмийг хөнгөлөхгүй.

2.2. Эрүүл мэндийн даатгалын байгууллагын эрх, үүрэг:

2.2.1. . Эрүүл мэндийн даатгалын байгууллага нь “Эрүүл мэндийн даатгалын сангаас үнийн хөнгөлөлт олгох зайлшгүй шаардлагатай эмийн нэр төрөл сонгох, үнийн дээд хязгаар, хөнгөлөх хэмжээ тогтоох аргачлал”-ын дагуу эрүүл мэндийн байгууллага, даатгуулагч болон бусад холбогдох байгууллагаас ирүүлсэн санал, хүсэлтийг судлан үнийн хөнгөлөлт үзүүлэх эмийн нэр төрөл, үнийн дээд хязгаар, хөнгөлөх хувь хэмжээг

тогтоох, өөрчлөх талаар саналд дүн шинжилгээ хийх, холбогдох байгууллагуудтай хамтран ажиллаж, жагсаалтыг шинэчлэх талаар ажиллах;

2.2.2. .Эрүүл мэндийн даатгалын сангаас үнийн хөнгөлөлт үзүүлэх эмийн нэр төрөл, үнийн дээд хязгаар, хөнгөлөх хувь хэмжээнд өөрчлөлт оруулах талаар эм ханган нийлүүлэх байгууллагууд, бусад холбогдох байгууллагуудын саналыгаа, судлах, эрх бүхий байгууллагад уламжлах, хамтран ажиллах;

2.2.3. .Эрүүл мэндийн даатгалын сангаас жороор олгох эмийн үнийн хөнгөлөлт үзүүлэх зардлын төсвийн төслийг даатгуулагчийн тоо, өвчлөлийн байдал, эмийн зах зээлийн үнэ, тусламж үйлчилгээний хүртээмж, өмнөх онуудын гүйцэтгэл, зөвшөөрөл бүхий эмийн сангийн тоо, зэрэглэл, байршил, үйлчлэх хүрээ болон бусад холбогдох мэдээлэлд үндэслэн боловсруулж, Эрүүл мэндийн даатгалын сангийн төсвийн төсөлд тусган шийдвэрлүүлэх;

2.2.4. .Эрүүл мэндийн даатгалын байгууллагад хүсэлт ирүүлсэн эмийн сантай “Даатгуулагчдад эмийн үнийн хөнгөлөлт үзүүлэх үйлчилгээг худалдан авах гэрээ” байгуулах, гэрээний хэрэгжилтэд хяналт тавих, гэрээний биелэлтээс хамаарч гэрээг үргэлжлүүлэх эсэх талаар шийдвэр гаргах, олон нийтэд мэдээллэх;

2.2.5. .Эмийн үнийн хөнгөлөлтөд олгох зардлыг 14 хоног тутам эмийн сангуудаас

ирсэн цахим нэхэмжлэлд үндэслэн эмийн үнийн хөнгөлөлтийн зардлыг гүйцэтгэлээр тооцон санхүүжүүлэх;

2.2.6. .Даатгуулагч болон эрүүл мэндийн байгууллага, эрх бүхий эмч нараас ирүүлсэн санал, хүсэлт, гомдлыг хүлээн авч хууль тогтоомжийн дагуу шуурхай шийдвэрлэх, даатгалын харилцаанд оролцогч талуудыг мэдээллээр ханган ажиллах;

2.2.7. .Эрүүл мэндийн даатгалын сангаас эмийн үнийн хөнгөлөлт үзүүлэх цахим жор бичих эрх бүхий эмч, гэрээ бүхий эрүүл мэндийн байгууллага, эмийн сан, эрүүл мэндийн даатгалын байгууллага хооронд мэдээллийн цахим тогтолцоог нэвтрүүлэх, тавих хяналтыг сайжруулах;

2.2.8. 8-Эмийн үнийн хөнгөлөлтийн тайлан, мэдээг тогтоосон хугацаанд эмийн сангуудаас авч, судалгаа хийж, үр дүнг үндэслэн холбогдох шийдвэрийг гаргах;

2.2.9. .Эрүүл мэндийн даатгалын байцаагч, мэргэжилтний ёс зүй, харилцаа, хандлагын талаар болон ашиг сонирхлын зөрчлийн талаар эрүүл мэндийн байгууллагаас ирүүлсэн гомдлыг хүлээн авч, холбогдох хууль тогтоомжийн хүрээнд шуурхай шийдвэрлэх;

2.2.10. .Гэрээ бүхий эмийн сан болон эрх бүхий эмч нарын буруутай үйл ажиллагааны улмаас даатгуулагчдад болон эрүүл мэндийн даатгалын санд хохирол учруулсан нь тогтоогдвол Зөрчлийн тухай хууль болон бусад хууль тогтоомжийн дагуу хохирлыг албан тушаалтан болон хуулийн этгээдээр төлүүлэх;

2.2.11. .Жор бичих эрх бүхий эмч нарт даатгуулагчдад үнийн хөнгөлөлт үзүүлэх эмийн цахим жор бичих “Эрүүл мэндийн даатгалын цахим систем”-д нэвтрэх эрх нээх, хаах асуудлыг хариуцах;

2.2.12. . Журмын 2.2.11-т заасан нэвтрэх эрхийг тухайн эрүүл мэндийн байгууллагаас цахим хэлбэрээр эрүүл мэндийн даатгалын байгууллагад хүргүүлж, цахимаар шийдвэрлүүлнэ;

2.2.13. . Хууль тогтоомжид заасан бусад эрх, үүрэг.

2.3. Даатгуулагчдад үнийн хөнгөлөлт үзүүлэх эмийн цахим жор бичих эмч, эрүүл мэндийн байгууллагын эрх, үүрэг:

2.3.1. Эрүүл мэндийн байгууллага, эмч нь эмийн үнийн хөнгөлөлт үзүүлэх цахим жорыг даатгуулагчдад мэргэжлийн дагуу үзлэг хийж, даатгуулагчийн иргэний үнэмлэх, даатгуулагчийн хурууны хээний баталгаажуулалт дээр үндэслэн бичих бөгөөд жор бичсэн эмч мөн хурууны хээний баталгаажуулалт давхар хийж цахим жор хүчинтэй болно;

2.3.2. Байнгын эм уух шаардлагатай архаг оноштэй даатгуулагчдад хяналтын үзлэгээр хөнгөлөлттэй эмээр үйлчлэх цахим жорыг хяналтын үзлэг хийсний дараагаар бичих бөгөөд анх удаа тухайн оношоор оношлогдож байгаа даатгуулагчдад анхан үзлэг, онош баталгаажуулах оношилгоо, шинжилгээ хийж давтан үзлэг хийгдсэний дараа хөнгөлөлттэй эмийн цахим жор бичнэ;

2.3.3. Эмч нь үндсэн харьяаллаас өөр аймаг, нийслэл, суманд байхаас үл хамааран эмийн үнийн хөнгөлөлт үзүүлэх цахим жорыг харьяалал харгалзахгүй бичих;

2.3.4. Жор бичих эрх бүхий эмч нь даатгуулагчид хийх үзлэгийн хугацааг 15 минутаас доошгүй байхыг баримталж ажиллах бөгөөд эрүүл мэндийн байгууллага хяналтыг давхар хийнэ;

2.3.5. Даатгуулагчдад үнийн хөнгөлөлт үзүүлэх эмийн цахим жор бичихдээ “Эмийн жорын маягт, жор бичилт” МЫ8 5376:2016 стандарт, Эрүүл мэндийн даатгалын тухай хуулийн 14 дүгээр зүйлийн 14.8.7-д заасны дагуу олон эмнэлзүйн удирдамжийг баримтлан бичнэ;

2.3.6. Эмч нь “Эм, эмнэлгийн хэрэгслийн тухай хууль”-ийн 6 дугаар зүйлийн 6.2. дахь хэсэг, 22 дугаар зүйлийн 22.4 дэх хэсэгт заасны дагуу баталгаажуулсан эмийн хэрэглэх зааварт заасан тунгаар насны хязгаарт тохируулан эмийн жор бичих ба цахим жорын тэмдэглэл хэсэгт үндэслэлээ тодорхой тусгах;

2.3.7. Эмч нь эмийн жорыг ерөнхий нэршлээр Эрүүл мэндийн даатгалын үндэсний зөвлөлийн тогтоолоор баталсан жагсаалтын дагуу латинаар бичих;

2.3.8. Эмийн жоронд заасан эмийн хэрэглэх хугацаа нь олон улсын эмнэлзүйн удирдамжид заасны дагуу эмчилгээний нийт тун, хоногийн нийт тунгийн хэмжээтэй уялдсан байх бөгөөд цахим системээр хязгаарлалтын хүрээнд ажиллана;

2.3.9. Эмчийн идэвхтэй хяналтанд байх хугацаанд хэрэглэж байгаа эмийн эмчилгээний үр дүнг хяналтын графикын дагуу тогтмол хянах;

2.3.10. Эмч нь мансууруулах, сэтгэцэд нөлөөлөх эмийг зөвхөн мансууруулах болон сэтгэцэд нөлөөт эмийн батлагдсан маягтад стандартын дагуу бичих;

2.3.11. Эрүүл мэндийн даатгалын сангаас үнийн хөнгөлөлт үзүүлэх эмийн жагсаалт, нэр төрөл, үнийн дээд хязгаар, хөнгөлөх хувь хэмжээ болон гэрээ бүхий эмийн сангуудын талаар иргэд, даатгуулагчийг үнэн зөв мэдээллээр ханган ажиллах;

2.3.12. “Эрүүл мэндийн даатгалын сангаас үнийн хөнгөлөлт олгох зайлшгүй шаардлагатай эмийн нэр төрөл, үнийн дээд хязгаар, хөнгөлөх хувь хэмжээ”-г баталсан Эрүүл мэндийн даатгалын үндэсний зөвлөлийн тогтоолын дагуу тухайн эмийг бичих эрхтэй эмчийн ангиллын дагуу жор бичнэ. Үүнд: А,В ангиллыг өрх, сум, тосгоны эрүүл мэндийн төв, клиник, С-ангиллыг нэгдсэн эмнэлэг, ортой клиник, амаржих газар, тусгай эмнэлэг, О-ангиллыг төрөлжсөн мэргэшлийн эмнэлгийн эмч бичнэ.

2.3.13. Хууль тогтоомжид заасан бусад эрх, үүрэг.

2.4. Эмийн үнийн хөнгөлөлтийн үйлчилгээ үзүүлэх эмийн сангийн эрх, үүрэг:

2.4.1. Эмийн сан нь Эрүүл мэндийн даатгалын байгууллагын цахим мэдээллийн системд холбогдох, эмийн сангийн санхүүгийн болон эмийн бүртгэлийн цахим програм хангамжийг бүрэн ашигладаг байх;

2.4.2. Эмийн сан нь Эрүүл мэндийн даатгалын сангаас үнийн хөнгөлөлт үзүүлэх жагсаалтанд заасан үнийн дээд хязгаараас доогуур үнээр эмээ борлуулж буй тохиолдолд тухайн доогуур үнээр тооцож хөнгөлөлт үзүүлэх;

2.4.3. Тухайн үед хүчин төгөлдөр мөрдөж буй хууль тогтоомж, эмийн сангийн стандарт шаардлагуудыг бүрэн хангасан байх;

2.4.4. Эмийн сангийн өдөр тутмын үйл ажиллагааг мэргэжлээрээ 3 ба түүнээс дээш жил ажилласан эм зүйч тогтмол удирдах, дотоодын хяналт тавих, цаашид тогтвортой ажиллах санхүүгийн болон хүний нөөцийн чадавхтай байх;

2.4.5. Эмийн сан нь эрүүл мэндийн даатгалтай холбоотой мэдээллийг иргэд, даатгуулагчдад харагдахуйц газар ил, тод байрлуулах;

2.4.6. Эмчийн бичсэн цахим жорын дагуу даатгуулагчийн иргэний үнэмлэхийг үндэслэн шуурхай, чирэгдэлгүй үйлчлэх;

2.4.7. Хэвтрийн болон хүнд өвчтэй эмийн санд өөрийн биеэр ирэх боломжгүй даатгуулагчийн хувьд асран хамгаалагч нь даатгуулагчийн иргэний үнэмлэхийг эмийн санд үзүүлж эмээ авна;

2.4.8. Эрүүл мэндийн даатгалын сангаас үнийн хөнгөлөлт үзүүлэх зайлшгүй шаардлагатай эмийн нэр төрөл, үнийн дээд хязгаар, хөнгөлөх хэмжээг мөрдөх, суурь болгон хамгийн өндөр хөнгөлсөн худалдааны нэрийн эмийн 90-ээс доошгүй хувийн нөөцтэй байх /сэтгэцэд нөлөөлөх, мансууруулах болон хорт хавдрын бүлгийн эмүүд орохгүй/;

2.4.9. Эмийн сан нь даатгуулагчид түүний овог, нэр, регистрийн дугаар, эмчийн шифр, жорын код, огноо, эмийн нэр, тоо ширхэг, эмийн тун, эмийн нийт үнэ үүнээс эрүүл мэндийн даатгалын сангаас болон даатгуулагчийн төлсөн төлбөрийн хэмжээг багтаасан “Нэмэгдсэн өртгийн албан татварын тухай хууль”-д заасны дагуу төлбөрийн баримтын хувийг даатгуулагчид тухай бүрт олгох;

2.4.10. Эмийн сан нь эмчийн бичсэн эмийн цахим жоронд ерөнхий нэршлээр бичигдсэн эмийг эмийн худалдааны нэршлээр авах боломжит сонголтыг даатгуулагчид тайлбарлах бөгөөд даатгуулагчид болон эмийн санчид аль алинд нь харагдах хоёр талт дэлгэц байршуулан харуулж, даатгуулагчаар сонголт хийлгүүлнэ.

2.4.11. Эмийн сан нь Төсвийн тухай хууль, Эрүүл мэндийн даатгалын байгууллагатай байгуулсан гэрээний дагуу эмийг эрх бүхий эмчийн бичсэн эмийн жоронд заасан эмчилгээний нийт тун, тоо хэмжээ, уух хугацааг баримтлан даатгуулагчид олгох, хяналт тавих;

2.4.12. Эмийн сан нь даатгуулагчид цахим жороор үйлчилгээ үзүүлсэн мэдээллийг зааврын дагуу тогтоосон хугацаанд эрүүл мэндийн даатгалын байгууллагад цахимаар илгээх;

2.4.13. Эрүүл мэндийн даатгалын сангаас авсан эмийн үнийн хөнгөлөлтийн зардлыг улирал, хагас, бүтэн жилээр эрүүл мэндийн даатгалын байгууллагатай тооцоо нийлэх;

2.4.14. Эмийн сан нь эмийн сангийн хаяг, байршил, талбайн хэмжээ, хүний нөөцөд өөрчлөлт орсон тохиолдолд эрүүл мэндийн даатгалын байгууллагад албан бичгээр ажлын 10 хоногийн дотор мэдэгдэх;

2.4.15. Эмийн сангийн стандартад заасан анхан шатны болон санхүүгийн баримтыг холбогдох хууль, журмын дагуу архивын нэгж болгон хадгалах;

2.4.16. Нийгмийн даатгалын шимтгэл төлөлтийн тайланг үнэн зөв, тогтоосон

хугацаанд гаргах, өр авлага үүсгэхгүй байх;

2.4.17. Үйлчлүүлэгчийн санал хүсэлт, эмийн цахим програм хангамжийн талаар эрүүл мэндийн даатгалын байгууллагад мэдээлэх;

2.4.18. Эрүүл мэндийн даатгалын сангаас жороор олгох эмийн үнийн хөнгөлөлт үзүүлэх журам болон гэрээнд нэмэлт өөрчлөлт оруулах талаар санал гаргах;

2.4.19. Эрүүл мэндийн даатгалын байгууллага болон эрүүл мэндийн байгууллага, даатгуулагч иргэдийн ёс зүй, харьцаа хандлагын талаар гомдол гаргах;

2.4.20. Хууль тогтоомжид заасан бусад эрх, үүрэг.

Гурав. Хориглох зүйл

3.1. Даатгалын гэрээ бүхий эмийн санд хориглох зүйл:

3.1.1. Эрүүл мэндийн даатгалын сангаас үнийн хөнгөлөлт үзүүлэх эмийн үнийн дээд хязгаарыг хэтрүүлэх, илүү төлбөр авах, “Нэмэгдсэн өртгийн албан татварын тухай хууль”-д заасны дагуу төлбөрийн баримтыг олгохгүй байх;

3.1.2. Эмийн сангийн анхан шатны бүртгэл мэдээ, эмийн нэр төрөл, орлого, зарлагын баримт, тайланг буруу буюу дутуу хөтлөх, эрх бүхий этгээдийн хууль ёсны шаардлагыг үл биелүүлэх;

3.1.3. Эм барих зөвшөөрөлгүй этгээдийг эм найруулах, бэлтгэх, шалгах, олгох үйл ажиллагаанд оролцуулах;

3.1.4. Монгол Улсын эмийн бүртгэлд бүртгэлгүй, хуурамч, чанарын баталгаагүй, хугацаа дууссан эмээр үйлчлэх;

3.1.5. Ашиг орлогоо нэмэгдүүлэх зорилгоор эмчтэй хуйвалдан эм борлуулах, үр дүнгээр урамшуулах, түүнтэй адилтгах үйл ажиллагаанд татан оролцуулах, эмийг худалдааны нэршлээр даатгуулагчид илт санал болгож, сонголтыг хязгаарлах;

3.1.6. Эм, эмнэлгийн хэрэгслийн тухай хуулийг зөрчин зар сурталчилгаа явуулах, тулган шаардах, буруу ташаа мэдээлэл өгөх, үйлчлүүлэгчийн сонгох боломжийг хязгаарлах;

3.1.7. Эрүүл мэндийн даатгалын байгууллагад эмийн сангийн стандарт, санхүүгийн болон хүний нөөц, бусад асуудлаар худал мэдээлэл ирүүлэх, байгуулсан гэрээгээр хүлээсэн үүргээ биелүүлэхгүй байх;

3.1.8. Төрийн хяналт шалгалт хийх эрх бүхий хуулийн этгээд, албан тушаалтны тавьсан хууль ёсны шаардлагыг үл биелүүлэх, төөрөгдүүлэх, шалгалтад холбогдолтой баримт бичгийг засварлах, гэмтээх, устгах, шалгалтаас зайлсхийх, хуурамч баримт бичиг

гаргаж өгөх;

3.2. Даатгуулагчдад үнийн хөнгөлөлт үзүүлэх эмийн жор бичих эмч, эрүүл мэндийн байгууллагад хориглох зүйл:

3.2.1. Эрүүл мэндийн даатгалын тухай хуулийн 14 дүгээр зүйлийн 14.8.7-д заасан олон улсын эмнэлзүйн удирдамжийг баримтлахгүйгээр даатгуулагчийн өвчний

онош, нас, хүйсэнд тохироогүй эм бичих;

3.2.2. Эмч үзлэг, оношилгоо, шинжилгээ хийхгүйгээр даатгуулагчид эмийн жор бичих;

3.2.3. Эрүүл мэндийн даатгалын цахим системд нэвтрэх эрх болон эмчийн шифрийг өөр хүнд ашиглуулах;

3.2.4. Эмчийн бичсэн жоронд санхүүгийн болон материаллаг урамшуулал авах, эмийг сурталчлах, худалдах;

3.2.5. Эрүүл мэндийн даатгалын тухай хуулийн 4 дүгээр зүйлийн 4.4-т заасан гадаадын иргэн, харьяалалгүй хүнд үнийн хөнгөлөлт үзүүлэх эмийн жор бичих;

3.2.6. Жорыг алдаатай бичих;

3.2.7. Жор бичих эрхтэй эмч нь тухайн эрүүл мэндийн байгууллагаас гарсан үед жор бичих эрхийг түтгэлзүүлэх цахим хүсэлтийг илгээхгүй байх.

3.3. Даатгуулагчид хориглох зүйл:

3.3.1. Өөр хүний бичиг баримтыг ашиглан эмийн жор бичүүлэх;

3.3.2. Эмчид үзүүлэхгүйгээр, мөн шаардлагагүй эм бичихийг эмчээс шаардах;

3.3.3. Эрх бүхий байгууллага, хуулийн этгээд, албан тушаалтны тавьсан хууль ёсны шаардлагыг үл биелүүлэх, эсэргүүцэх, нэр хүндийг гутаан доромжлох, гүтгэх, худал мэдээллийг тараах, төөрөгдүүлэх, нийтэд дэлгэх.

Дөрөв. Хариуцлага

4.1. Энэхүү журмыг зөрчсөн иргэн, хуулийн этгээдэд Зөрчлийн тухай хууль болон бусад хууль тогтоомжийн дагуу хариуцлага хүлээлгэх;

4.2. Эмийн сан нь гэрээгээр хүлээсэн үүргээ биелүүлээгүй, үйлчилгээний чанар, хүртээмжийн талаар иргэдээс удаа дараалан гомдол ирүүлсэн тохиолдолд тухайн зөрчлийг арилтал санхүүжилтийг түдгэлзүүлэх, дээрх зөрчил давтан илэрсэн, хуурамч баримт бичгээр санхүүжилт авсан нь нотлогдсон тохиолдолд гэрээг цуцлах, эрүүл мэндийн даатгалын санд учруулсан хохирлыг нөхөн төлүүлэх хүртэл арга хэмжээ авах;

4.3. Тус журмын хориглох хэсгийг зөрчсөн нь нотлогдсон тохиолдолд эрүүл мэндийн

даатгалын байгууллага болон эмийн сан хооронд байгуулсан гэрээг цуцлах, тусгай зөвшөөрөл олгодог эрх бүхий байгууллагад эрүүл мэндийн даатгалын байгууллагын зүгээс гомдол санал хүргүүлж арга хэмжээ авхуулах;

4.4. Эмийн үнийн хөнгөлөлт үзүүлэх цахим жор бичих эрх бүхий эмч нар энэхүү журмыг зөрчсөн, даатгуулагч иргэдээс ирүүлсэн гомдол нь үндэслэлтэй нь нотлогдсон тохиолдолд тухайн эмчийн “эрүүл мэндийн даатгалын цахим систем”-д нэвтрэх эрхийг хааж, эрүүл мэндийн байгууллагын амбулаторийн үзлэг, оношилгоо, шинжилгээний зардлын төлбөрийг бууруулах, хохирлыг нөхөн төлүүлэх арга хэмжээ авч олон нийтэд мэдээллэх;